

【阿咪¹】李夢花原作

吾屋下從來就毋識畜狗畜貓，一來係阿媽歸日仔做事無閒泊叔，又愛無閒煮三餐，二來係佢當愛淨俐，畜狗仔同貓仔驚怕會遭跳蚤。一直到老弟間房个天篷頂，逐暗晡一群老鼠在該走來走去，呼呼磅磅²吵到佢睡毋得，正高不將同上屋个鄰舍，捉一隻細貓子畜來打老鼠。

鄰舍个貓嫲這胎正養兩隻，一隻就係吾屋下這隻，灰色間³白色同豬肝色花刺花刺⁴，看起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌脚个下背幾日仔，恁樣正會認屋，阿爸就膠佢綯到桌腳下。正經有影哦！幾日仔放佢，阿咪就乖乖，毋會儘採走。

因為毋識畜過貓仔，阿媽乜毋知愛分佢食麼个？人講：貓愛食臊。阿媽就用四破魚攪飯飼。一站仔過後，阿爸講：「毋好分

佢食忒飽，慣勢咧就毋會去打老鼠。」聽雜貨店个叔姆講厥屋下該隻，就係食到肥固固仔，日日食飽睡、睡飽食，連老鼠在脣頭過，佢就目珠擘開睜一下，做佢睡。該幾日逐早晨，阿爸就去豬砧買一埕豬肝分阿咪食。第一擺豬肝買轉來，阿媽愛拿來煮熟，阿爸煞煞講：「分貓仔食生豬肝，係愛佢慣食生个味緒，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸胥疏个暗晡頭，看著佢个目珠仁，像兩粒青色个寶石樣仔當金當靚，灶下个黃蛭趁來趁去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞哩。

毋多知仔，阿咪畜有十四年咧，照個人个年齡換算，佢有七十零歲哩。該日阿咪懶蜈蚣仔無精神，食个東西又嘔出來，好得看過獸醫注射過，幾日仔就好咗。阿媽笑笑對阿咪講：「你同佢共樣，老咧。」阿咪當像聽得識樣仔，第二日打隻細老鼠挑挑放在灶下，像係愛膠阿媽講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜同人共樣，係有感情有靈性个，還有該種毋認老个打拚精神啊。

¹ 阿咪：音 a' mi；貓的名字。

² 呼呼磅磅：音 bin bin bong bong；狀聲詞，形容老鼠在天花板跑動的聲響。

³ 間：音 gam；摻雜調和。

⁴ 花刺花刺：音 fa' la' fa' la'；花色混雜。